



mjesečni Bilten

omladinska mreža bosne i hercegovine

mart
ožujak
2017.

214

Dragi prijatelji/ce,

Predstavljamo vam martovsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **182** organizacije i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u martu 2017.	2
Planovi za april 2017.	5
Aktivnosti članova mreže.....	6
Saopštenja/informacije/donatori/pozivi	23

Uživajte u čitanju!

AKTIVNOSTI ORC/HCA U MARTU 2017.



Claim!

CITIZEN'S NETWORK FOR PEACE, RECONCILIATION AND HUMAN SECURITY

„Prekograničnu građansku mreža za mir, pomirenje i sigurnost ljudi na Balkanu“ implementira Helsinški parlament građana Turska, zajedno sa partnerima: ADP ZID Crna Gora, SeConS Srbija, Institut za regionalne i internacionalne studije Bugarska, Centar za istraživanje, dokumentaciju i publikovanje Kosovo, Omladinski resursni centar Tuzla. Aktivnosti mreže je od samog početka finansirala Komisija EU ali i brojne druge organizacije poput: Friedrich Ebert Stiftung (Istanbul, Brisel, Sofia); Fondacija otvorenog društva (Turska); te Britanska ambasada u Ankari.

Krajem februara, organizovanjem još jedno sastanka stejkholdera, te promovisanjem rezultata projekta, završili smo četverogodšnji ciklus. Tokom marta radili smo na prevodima i pripremama za publikovanje regionalnog Istraživačkog izvještaja, koji će vam biti prezentovan u narednom periodu. Iako je završio četverogodišnji projektni ciklus, Pregogranična građanska mreža za mir, pomirenje i sigurnost ljudi na Balkanu nastavlja sa svojim aktivnostima. O svim narednim aktivnostima informisaćemo vas u našim glasilima, ali i na stranicama www.omladina-bih.net i <http://cn4hs.org/>

Omladinska grupa ORC Tuzla

Obilježavanje dana maternjeg jezika

Članice Omladinske grupe ORC-a Amina Džananović i Melisa Memeti su drugog marta u prostorijama JUMS Mašinske škole Tuzla u suradnji sa profesoricom Sabinom Suljanović, organizirale obilježavanje dana maternjeg jezika. Ugostili su bivšu učenicu Mašinske škole, Fatmu Bulić. Fatma je djevojka koja svoj život provodi u invalidskim kolicima i to je ne zaustavlja u njenom aktivizmu, ambicijama i tome da bude uzor drugim mladima. Ona je ovom prilikom predstavila svoj prozni i poetski rad, ispričala svoju životnu priču i podsjetila učesnike koje su zaista bitne stvari životu.



Graffiti – huliganstvo ili umjetnost



Mjesec mart u Omladinskoj grupi ORC obilježili su graffiti. Od 13.3 do 17.3.2017. godine u Tuzli je upriličena „Graffiti sedmica“, kao niz aktivnosti u sklopu projekta „Graffiti – huliganstvo ili umjetnost“. Projekat su osmislili članovi Omladinske grupe ORC, u saradnji sa Lokalnim timom Tuzla Asocijacije srednjoškolaca u BiH, a finansijski ga je podržala Omladinska banka Fondacije tuzlanske zajednice.

Cilj projekta je bio upoznati mlade ljude sa graffitima kao umjetnošću, ali i sa problematikom sa kojom se susreću mnogi graffiti umjetnici. Kroz razne aktivnosti se željela skrenuti pažnja na pravljenje razlike između umjetničkog rada i crtanja neprimjerenih simbola ili natpisa koji nanose štetu lokalnoj zajednici i njenim građanima.

Ovaj projekat je održan u tri faze, a to su:

Prvi dan je bilo organizirano čišćenje kulturnih, historijskih spomenika, saobraćajnih znakova od neprimjerenih natpisa. Početna tačka za čišćenje je bila gradska česma koja je simbol Tuzle, a na kojoj je bio ispisan neprimjeren natpis. Nakon toga volonteri grupe i učenici Građevinsko-geodetske škole su vrijedno radili na čišćenju ostatka grada (Korzo, šetalište Slana Banja, saobraćajni znakovi...)



Nakon čišćenja uslijedile su radionice koje su se održavale tri dana, kako bi što više srednjoškolaca moglo prisustvovati. Na radionicama su se kreativno obrađivale teme aktivizma i graffiti. Cilj radionica je bio mladima objasniti razlike između umjetnosti i huliganstva, te da se stane u kraj etiketiranju onih koji se bave graffitima. Radionice u kojima je učestvovalo stotinu tuzlanskih srednjoškolaca vodili su Ivana Jokić, Amela Mulahmetović i Šaban Šerifović.



Posljednjeg dana Graffiti sedmice učesnici i graffiti umjetnici su kao finalnu aktivnost izradili dva murala kojima su pokazali da graffiti na primjerenim mjestima zaista jesu umjetnost. Murali su rađeni na Gimnaziji Meša Selimović i

na igralištu na Brčanskoj Malti. Na ovaj način se naš grad obogatio i postavio u rang sa svjetskim gradovima, u kojima je svaki vid umjetnosti cijenjen i ima svoje mjesto.



Ovakve aktivnosti mogu biti poticaj mladima da se izražavaju slobodno i poruka svima da se u Tuzli podržavaju sve vrste umjetnosti.

„Projekat je prvijenac novih članova Omladinske grupe ORC, tako da smatram da su ga iznijeli najbolje što su mogli - uzimajući u obzir da su to srednjoškolski završnog razreda i da prethodno nisu imali iskustva u vođenju projekta. Sve održane aktivnosti su praćene samo pozitivnim komentarima i podrškom od strane građana Tuzle, učesnika u radionicama, srednjih škola sa kojima smo surađivali, graffiti umjetnika i svih koji su čuli i vidjeli to što se radi u okviru Graffiti sedmice. Srednjoškolski su bili pozitivno iznenađeni radionicama gdje su imali priliku naučiti nešto novo i čuti iz prve ruke priču graffiti umjetnika. Ponosna sam na omladince, učesnike, grafitere i sve druge koji su ovaj projekt učinili uspješnim. Vjerujem da je ovo samo početak jedne velike priče koja će u budućnosti pomoći afirmiranju mladih umjetnika.“ –



izjavila je Ivana Jokić, koordinatorica Omladinske grupe Omladinskog resursnog centra Tuzla.

Online kampanja za borbu protiv govora mržnje



Slobodan Blagovčanin, Adi Selman, Mirela Biković, Ivana Jokić i Nedim Musić su imali inicijalni sastanak sa partnerskom organizacijom PRONI u Brčkom 23.3.2017. gdje su detaljnije dogovorili organizaciju online kampanje. Kampanja CAT (Citizens against terrorism) će se baviti problematikom ekstremizma i terorizma.

„Ekipa iz komšiluka – poruka iz provincije“

„Crew from the hood“


Cilj projekta „Crew from the hood“ je izražen kroz motivaciju donosioca odluka za podsticanje aktivne suradnje alternativne kulture, afirmaciju i društveno priznanje za alternativnu kulturnu scenu. Projekat se fokusira na aktivnu alternativnu kulturnu scenu u tri regiona: istočna Bosna i Hercegovina, zapadna Srbija i sjeverna Crna Gora. Tokom marta smo nastavili sa pripremama za predstojeće aktivnosti (održavanje radionica i priprema za uličnu kampanju), te održali radni SKYPE sastanak sa partnerima na projektu. Više o aktivnostima u okviru ovoga moći ćete pogledati na našim stranicama i portalima.

Redovne aktivnosti ORC i hCa Tuzla:

Tokom marta radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH.

PLANOVI HCA/ORC-A ZA APRIL 2017.

- Sprovođenje redovnih aktivnosti kroz Omladinsku mrežu BiH;
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine;
- Pripreme za organizovanje godišnjeg sastanka ALF mreže BiH;
- Nastavak aktivnosti na partnerskom projektu „Crew from the hood – Messages from province“, sa partnerima iz Srbije (Forum građanske akcije – FORCA Požega) i Crne Gore (NGO Fenomeni Kolašin).



AKTIVNOSTI ČLANICA OMLADINSKE MREŽE BiH



Međunarodni centar za djecu i omladinu FORTIS

Ul. Suljo Čilić bb, 88420 Jablanica

Tel./fax: +387 63 334 993, +387 61 327 427

E-mail: centarfortis@yahoo.com

Web: www.centar-fortis.org

Obavijest

U subotu 1.4.2017. godine, održat će se drugi "Omladinski susreti kroz klasičnu muziku" koje realizuje Međunarodni centar za djecu i omladinu "Fortis" iz Jablanice.

Na susretima će nastupati poznati pijanist Bartolomej Stanković sa učenicima Male škole klavira iz Jablanice. Susreti će se održati u prostorijama Muzičkog centra Pavarotti u Muzičkoj školi I i II stupnja u Mostaru, sa početkom u 11:00 sati. Na susretima će nastupati i učenici Muzičke škole I i II stupnja sa direktorom škole Mustafom Šantićem.

Ovo je projekat koji sufinansira Federalno ministarstvo kulture i sporta/športa i Općina Jablanica (Vijeće mladih općine Jablanica) već drugu godinu. Projekat ima za cilj saradnju između dvije ustanove u oblastima kulture, edukaciju omladine bez obzira na njihovu nacionalnu ili regionalnu pripadnost sa težištem na klasičnoj muzici kroz radionice i seminare.





Udruženje studenata Medicinskog fakulteta u Tuzli "Medicus"

Univerzitetska br. 1., 75 000 Tuzla

Tel: predsjednik: 00 387 (62) 944-739; sekretar: 060/3101-602;

Telfax: 035/320-600(1).

web: www.us-medicus.ba; e-mail: medicus.tz@gmail.com; info@us-medicus.ba

Uspješno završen četvrti Tuzla Brain Week!



„Tuzla Brain Week“ – TBW je naziv projekta pod kojim se u Tuzli obilježila sedmica mozga u periodu od 13. do 19. marta, u okviru globalne inicijative Brain Awareness Week. Ovu inicijativu su pokrenuli DANA fondacija i Federacija europskih neuroznanstvenih društava, te Tuzla Brain Week predstavlja jedini projekat u cijeloj Bosni i Hercegovini koji se implementira uz podršku prethodno navedenih institucija, i to po četvrti put zaredom. **Glavni cilj projekta jeste približavanje tematike neuroznanosti na posebno koncipiran način koji će biti prilagođen i razumljiv za sve njegove učesnike.**

Ove godine je Tuzla Brain Week počeo sa svečanom ceremonijom otvaranja na Medicinskom fakultetu Tuzla sa preko 300 zvanica, gostiju, studenata, učenika i drugih zainteresovanih. Ceremoniji otvaranja su prisustvovali predstavnici Vlade Tuzlanskog kantona, Univerziteta u Tuzli, Medicinskog fakulteta, Univerzitetskog kliničkog centra Tuzla, Internacionalnog Burch Univerziteta iz Sarajeva, i dr.

U toku same sedmice mozga održavane su radionice u: predškolskoj ustanovi „Aladin“, JU Osnovnoj školi „Centar“, Zavodu za odgoj i obrazovanje osoba sa smetanjama u psihičkom i tjelesnom razvoju Tuzla, Prirodno-matematičkom fakultetu Tuzla, Filozofskom fakultetu Tuzla, JU "Dom Penzionera" Tuzla, kao i dvije posebne radionice u Centru za mentalno zdravlje Doma Zdravlja Tuzla sa učenicima Mještovite Srednje hemijske škole Tuzla. U okviru velike radionice na otvorenom, koja je održana u srijedu na Trgu Slobode, pored okolnih prolaznika posebno učešće su uzeli učenici Mješovite srednje saobraćajne škole, kao i članovi OKK „Sloboda“.



Pored radionica, održane su i aktivnosti poput okruglog stola na UKC Tuzla gdje su studenti iz susjednih zemalja i drugih gradova iz BiH imali priliku da slušaju predavanja prof.dr. Osmana Sinanovića i prof.dr. Mirjane Vidović, kao i da učestvuju na posebnoj radionici psihodrame vođene od strane psihologa, Samire Selesković. Također studenti su imali priliku da izlažu svoje naučno-istraživačke radove i prezentuju svoj rad internacionalnom auditorijumu. Training kuća za mlade „Labirint“ je bila odgovorna da odmor naših gostiju.

I ove godine, neizostavna aktivnost je bila „Naučni kafić“, zasnovana po principu neformalnih predavanja koja su ove godine održavana u Just Caffe Pub-u, i to sa predavačima iz oblasti ekonomije, prava, inženjeringa i glume koji su ponudili jedan novi pogleda na mozak i njegovu funkciju.





VIJEĆE MLADIH FEDERACIJE BOSNE I HERCEGOVINE

4. viteške brigade 34-36, Ilidza

Tel./Fax: +387 33 778-770

E-mail: vmfbih@gmail.com

Web: www.vijecemladih.ba

Posjeta Vijeća mladih FBiH Unsko-Sanskom kantonu



Članovi Upravnog odbora Vijeća mladih FBiH u periodu 9. do 11.03.2017. godine su bili gosti u Unsko sanskom kantonu, tačnije Vijeću mladih Općine Ključ. U okviru posjete Unsko sanskom kantonu, članovi Upravnog odbora su održali sastanak sa Premijerom ovog kantona, gospodinom Huseinom Rošićem. Ovaj sastanak je protekao u odličnoj atmosferi, gdje smo imali priliku razgovarati o budućim koracima prema usvajanju prve kantonalne Strategije prema mladima u Federaciji BiH. Pored Strategije prema mladima, razgovarali smo i o položaju mladih u ovom kantonu i o tome šta se može uraditi da se smanji odlazak mladih iz Unsko sanskog kantona.

Nakon sastanka sa Premijerom, članovi Upravnog odbora imali su sastanak u Ministarstvu obrazovanja, nauke, kulture i sporta, gdje smo detaljnije razgovarali o uključivanju lokalnih Vijeća mladih u sam proces usvajanja Strategije prema mladima USK.

Upravni odbor je po povratku u Ključ održao svoj sastanak, gdje smo zaključili naredne korake koje ćemo raditi za poboljšanje položaja mladih u FBiH. Zahvaljujemo se Omladinskim organizacijama Kosmos i Dekameron jer su nas ugodili u svojim prostorijama.



Tematska sjednica Parlamenta FBiH o iseljavanju stanovništva



Na inicijativu zastupnika Dennisa Gratza ispred Naše stranke u Parlamentu Federacije BiH je 22.3.2017. godine održana tematska sjednica o iseljavanju stanovništva. Ispred Vijeća mladih FBiH ovoj sjednici su prisustvovali Mate Lončar i Mirela Geko. Kao legitimni predstavnici mladih u Federaciji Bosne i Hercegovine, imali smo mogućnost da se obratimo svim zastupnicima i zastupnicama te gostima koji su bili prisutni na ovoj tematskoj sjednici. Predsjednik Vijeća mladih Federacije Bosne i Hercegovine Mate Lončar u svom izlaganju je rekao da 65 posto mladih ljudi želi napustiti Bosnu i Hercegovinu jer ne vide perspektivu u domovini. Pozivajući se na podatke iz istraživanja Instituta za razvoj mladih "Kult", Lončar je naveo da je više od 60 posto mlade populacije nezaposleno, a 27

posto ne smatra da će se situacija promijeniti. Osnovni razlog željenog odlaska su loša ekonomska situacija i nemogućnost zaposlenja, dodao je.

Poseban akcenat je stavljen na veću implementaciju Zakona o mladima FBiH koji postoji od 2010. Godine, ali se nažalost jako malo implementira u čitavoj Federaciji BiH. "Vijeće mladih je spremno podržati svaku pozitivnu mjeru i korak koji rješava probleme. Krajnje je vrijeme da se uhvatimo ukoštac s ovim problemima, da mlade vidimo kao resurs i da zaustavimo iseljavanje. Mladi nisu problem već rješenje", rekao je Lončar obraćajući se poslanicima na tematskoj sjednici Predstavničkog doma Federalnog parlamenta posvećenoj iseljavanju stanovništva iz Federacije.

Nakon tematske sjednice, predsjednik Vijeća mladih FBiH je zajedno sa inicijatorom ove tematske sjednice bio gost u emisiji Tema dana na BHT1, a čitavu emisiju možete pogledati na linku:

<http://www.bhrt.ba/bht1-emisije/tema-dana-bht1/tema-dana-22-03-2017/>

Pokrenut Instagram profil

Vijeće mladih FBiH je pokrenulo i svoj Instagram profil u želji da se što više približimo mladim ljudima. Naš profil na instagramu je @vijecemladih





Institut za razvoj mladih KULT

Ul. 4. viteške brigade 34-36 BA, 71210 Ilidža, Sarajevo

E-mail: kult@mladi.org

Tel.: +387 33 778 778; Fax: +387 33 778 779

Web: www.mladi.org

U Bijeljini održan Biznis forum „Rasterećenjem privrede do novih radnih mjesta“

Mlade ćemo zadržati ako se okrenemo privredi i sličnim temama, a ne aktuelnostima i općenitostima što je trenutna praksa. Većina političara i ne zna koja je visina prosječne plate. Apsolutno podržavam ovakve teme jer nama treba ambijent koji će privući investitore i stvoriti radna mjesta, a za to nam trebaju strateški i dugoročni planovi, poručio je predsjedavajući Predsjedništva Bosne i Hercegovine Mladen Ivanić na Biznis forumu „Rasterećenjem privrede do novih radnih mjesta“, koji je održan 22. marta 2017. godine u Bijeljini.



Forum su organizovali Institut za razvoj mladih KULT i Grad Bijeljina kako bi privrednici, predstavnici resornih institucija vlasti, stručnjaci iz oblasti ekonomije, poslovnog okruženja i zapošljavanja, te mladi poduzetnici govorili o gorućim problemima u bh. privredi.

Kako je zaključeno tokom Foruma, lokalne zajednice su najbliže privrednicima i mogu i trebaju učiniti mnogo više za privredu. One su te koje trebaju i moraju inicirati zakonske izmjene i na višim nivoima. Govorilo se i o nedostatku prakse u obrazovanju, ali i o borbi za opstanak pojedinih, uglavnom zanatskih, zanimanja.

“Institut već skoro petnaest godina intenzivno radi na kreiranju povoljnijeg ambijenta za život mladih u BiH.

Nova radna mjesta jedan su od osnovnih elemenata za izgradnju takvog ambijenta zbog čega se Institut i uhvatio u koštac s ovako važnim problemima.” – poručio je Jasmin Bešić, izvršni direktor Instituta za razvoj mladih KULT.

Mladi poduzetnici predstavili su uspješne priče o pokretanju vlastitog biznisa kako bi motivisali mlade na slične poduhvate, govorili o problemima prilikom pronalaska posla i prezasićenosti tržišta, dok su privrednici tražili veću uključenost i pomoć od države, ali i veću zaštitu radnika.

Biznis forum „Rasterećenjem privrede do novih radnih mjesta“ organizuje Institut za razvoj mladih KULT uz podršku Grada Bijeljina, a u okviru inicijative "Poslovni prostor BH" koju vodi Institut za razvoj mladih KULT, a koja je dio Projekta održivosti civilnog društva u Bosni i Hercegovini (CSSP), koji realizuju Centri civilnih inicijativa (CCI) i Centar za promociju civilnog društva (CPCD), a koji je podržan od Američke agencije za međunarodni razvoj (USAID).

Kako zaustaviti odlazak mladih?

Biti mlad u Federaciji BiH je iznimno teško jer ovaj bh. entitet ni 22 godine poslije rata nije razvio strateški pristup prema problemima koji mlade navode na odlazak – poručila je Katarina Vučković iz Instituta za razvoj mladih KULT na tematskoj sjednici Predstavničkog doma Federalnog parlamenta.

Inicijator tematske sjednice o iseljavanju stanovništva iz FBiH koja je idržana 23. marta 2017. godine bio je poslanik Naše stranke Dennis Gratz koji ističe da je ova pojava dobila alarmantne razmjere i da joj posebnu težinu daje odlazak mladih.

Kako je predstavnica Instituta istakla tokom svog obraćanja, mladi ove zemlje nisu problem, ali se u svim životnim aspektima susreću sa problemima: od adekvatnog zaposlenja, preko kvalitetnog slobodnog vremena do društvene uključenosti i jednakog pristupa u zdravstvu.

„Šta smo im to mi, odrasli, ponudili u ovih dvadesetak godina da ostanu, osim praznih i poraznih obećanja? Možemo li zajedno bolje, mislimo li početi koristiti resurse upravo među mladima i pozvati ih da grade sebe, ali i zemlju u kojoj žive?“ – poručila je Vučković.



Prema popisu stanovništva u Bosni i Hercegovini danas živi 773 850 mladih ljudi, a to je 1/5 našeg stanovništva. Posljednje valjano opsežno istraživanje o mladima u Bosni i Hercegovini je rađeno 2008 godine, a jedino takvo u Federaciji BiH rađeno je 2013. Od tada do danas o mladima u ovoj zemlji govorimo kao o problemu, pitanju, poražavajućim brojkama odlaska, a pitamo li se šta smo kao pojedinci i društvo učinili da se u ovoj zemlji mladi osjećaju kao rješenje, odgovor i ohrabrujući broj ostanaka.

Istraživanje, koje je po nalogu Federalnog ministarstva kulture i sporta 2013. radio Institut za razvoj mladih KULT, pokazalo je da četvero od petero mladih ljudi želi napustiti FBiH, a da je dobar dio njih već napravio prve

korake za to. Kao razlog i tada kao i danas navodili su nedostatak radnih mjesta, korupciju i nepotizam, neadekvatne uvjete u obrazovanju.

Svjetska banka navodi kako je stopa emigriranja visoko obrazovanih pojedinaca u BiH danas 23,9% vodeća u regiji i svijetu. Broj nezaposlenih mladih (15-24) je prema ILO u BiH 57,5%, a Svjetski ekonomski forum Bosnu i Hercegovinu svrstava na 134/138 mjesto po kapacitetu da zadrži talentirane pojedince, a na 135/138 mjesto po kapacitetu da privuče talentirane.

Fenomen odlaska mladih ljudi dobio je pažnju nakon što je Institutu iznio podatak da se prema nekim procjenama iz BiH od rata do 2013. iselilo oko 150 000 mladih, a naše kolege iz Unije za održivost dali informaciju da je samo u 2015. 68 000 osoba, većinom mladih, napustilo BiH.

Federacija Bosne i Hercegovine, ukoliko želi zaustaviti negativni trend, neophodno je da mladima pristupi strateški te jasno, kroz strategiju prema mladima, da kratkoročne odgovore na neke od problema mladih, ali i dugoročnu viziju uključivanja mladih u vlastiti razvoj.

Federacija Bosne i Hercegovine mora, jednako kako to već 15-tak godina čini Republika Srpska, odgovoriti na sve probleme mladih strateškim pristupom – kreirati sveobuhvatnu politiku prema mladima. Mladima moramo jasno dati do znanja da će im domovina pružiti prilike za rast i razvoj u svim aspektima života te ih uključiti u razvoj ali i ohrabriti na povratak.

Strategija prema mladima predstavlja dokument institucija vlasti sa programskim pristupom djelovanjima prema mladima što uključuje definirane probleme i potrebe mladih, strateške pravce djelovanja i mjere za realizaciju ciljeva strategije.

Radna grupa Vlade Federacije BiH za izradu prvog nacrtu Strategije prema mladima okončala je svoj posao u augustu 2015. g. Institut za razvoj mladih KULT je kroz svoje programe bio konsultativno-tehnička podrška Radnoj grupi. Zadovoljstvo nam je bilo raditi sa predstavnicima ministarstava i institucija koje su sudjelovali u izradi prvog nacrtu strategije prema mladima u FBiH.

Prva strategija prema mladima obuhvata sljedeća područja života mladih u FBiH:

- rad, zapošljavanje i preduzetništvo
- socijalna briga
- zdravstvena zaštita
- sigurnost
- kultura i sport
- aktivizam (učesće, volontiranje i mobilnost)

Strateškim pristupom vlasti u FBiH mogu i moraju mijenjati ambijent u kojem mladi odrastaju, ostaju, vraćaju se i žive. Mladi nisu budućnost, već sadašnjost našeg društva. Ne smijemo ih (na)pustiti.

Pokreće se poslaničko pitanje oko izmjena Zakona o PDV-u

O inicijativi za izmjenu Zakona o PDV-u s ciljem zaštite privrednika i olakšanja poslovanja malih i srednjih preduzeća, u Predstavničkom domu Parlamentarne skupštine BiH govorio je zastupnik u Zastupničkom domu PS BiH Saša Magazinović.

Zastupnik Magazinović podržao je inicijativu Instituta za razvoj mladih KULT za uvođenje sistema plaćanja PDV-a po naplaćenim fakturama za razliku od današnje prakse koja podrazumijeva da privrednici plaćaju PDV po izdatim fakturama, a rješenje za ovaj problem tražit će kroz pitanje upućeno Vijeću ministara BiH, Upravi za indirektno oporezivanje i Upravnom odboru Uprave za indirektno oporezivanje u kojem su ministri finansija.

„Ovaj problem je veliki i često se dešava da privrednici pokušavaju ostati na tržištu, zapošljavaju ljude, organizuju biznis, ali zakonske prepreke im onemogućavaju da zaštite taj biznis.“ – naglasio je Magazinović.

Institut za razvoj mladih KULT je inicijativu za izmjene Zakona o PDV-u pokrenuo u martu prošle godine, podržan takozvanom Mrežom za kreiranje boljeg poslovnog ambijenta, koju čine predstavnici institucija vlasti, privrede, nevladinog, akademskog i medijskog sektora.



U okviru Inicijative pismo podrške za ovakav vid izmjena potpisalo je 30.000 privrednika iz cijele zemlje, dakle i iz FBiH i RS.

"Jedna od prepreka koje privrednici imaju je obaveza plaćanja PDV-a kada izdaju fakturu bez obaveze da tu fakturu neko i plati. Suština inicijative je da umjesto plaćanje PDV-a odmah po izdatoj fakturi, PDV bude plaćen onda kada tu fakturu naplatite. Činjenica je da ovaj sistem funkcioniše u 22 zemlje Evropske unije. Govorimo o malim i srednjim preduzećima i svjesni smo da Elektroprivredi nije problem odmah platiti PDV, ali malim preduzećima sa malim brojem ljudi je veliko da za fakturu od 10.000 plate 1.700 KM PDV-a. Trenutni sistem je jednostavan, osigurava državi prikupljanje

novca, ali ne brine o privrednicima. Novi sistem bi bio komplikovaniji, privrednici bi bili zaštićeni, a država bi dobila isti iznos novca" – naglasio je Magazinović.

Predloženi sistem nije novina. Već je u primjeni u 22 zemlje EU, a na snazi je i u zemljama regije. Hrvatska sistem primjenjuje od 2015. godine, a Srbija od 2013. godine.

„Ono što može biti zabrinjavajuće i postavlja se kao logično pitanje – šta je sa punjenjem budžeta. Znamo da se budžet puni dijelom od prihoda od indirektnih poreza, među kojima je i porez na dodanu vrijednost. Tako da su, zemlje ograničile krajnji rok uplate PDV-a, odnosno rok do kojeg mogu takoreći odgoditi plaćanje PDV-a državi. Najčešće je to rok do godinu dana. Trenutno na području FBiH postoji i novi Zakon o finansijskom poslovanju koji ograničava rok plaćanja između dva preduzeća na 30 dana, odnosno između privatnog preduzeća i javnog preduzeća, odnosno ustanove na 60 dana. Međutim, ti rokovi podposebnim uslovima mogu biti i duži. Ovakav zakon bi mogao i trebao uz izmjenu Zakona o PDV-u biti adekvatno rješenje i za privredu i za punjenje budžeta. Pored toga, ovakvim sistemom se može dugoročno i povećati punjenje budžeta, ako se pomogne likvidnost malih preduzeća i spriječi njihovo zatvaranje.“ – istakla je Ajka Baručić, ekonomska stručnjakinja u Institutu za razvoj mladih KULT.

Zagovaranje izmjene Zakona o PDV-u provodi se u okviru inicijative "Poslovni prostor BH", koju vodi Institut za razvoj mladih KULT. Inicijativa je dio Projekta održivosti civilnog društva u Bosni i Hercegovini (CSSP), koji provode Centri civilnih inicijativa (CCI) i Centar za promociju civilnog društva (CPCD), a koji je podržan od Američke agencije za međunarodni razvoj (USAID).

Omladinski klub "DIJAMANT"

Ul. Bučići 42, 70101 Jajce

Tel./fax: +387 30 279 444, +387 61 179 209, +387 63 366 811

E-mail: m.sekib@bih.net.ba

WEB: www.ocd-dijamant.net, www.dijamantmoda.com

Omladinski klub „Dijamant“ organizovao peticiju u Jajcu

Zdravstvena mreža BiH i Partnerstvo zdravlja sprovode kampanju "Moje zdravlje nema roka" putem koje se traži zakonsko ukidanje rokova prilikom prijave na Biro za zapošljavanje.

Tim povodom u Jajcu je organizovano prikupljanje potpisa za podršku inicijativi koja će biti upućena u Parlament Federacije BiH. Ovu akciju je u našem gradu sproveo Omladinski klub "Dijamant", a štand je bio postavljen kod Travničke kapije od 13 sati.



Među isključenima iz sistema zdravstvene zaštite, odnosno onima koji nisu pokriveni zdravstvenim osiguranjem najbrojniji su nezaposleni koji nisu registrovani kao takvi, ili koji su propustili rok za prijavu kod Zavoda za zapošljavanje.

Zakonom o zdravstvenom osiguranju FBiH ostvarivanje prava na zdravstveno osiguranje nezaposlenih lica uslovljava se prijavom u određenom/iznimno kratkom roku na evidenciju službe za zapošljavanje

Po zakonu o zdravstvenom osiguranju osiguranici su između ostalog i nezaposlena lica koja su prijavljena zavodu za zapošljavanje ako su:

- se prijavila u roku 30 dana nakon prestanka radnog odnosa
- se prijavila u roku od 30 dana nakon služenja vojnog roka
- se prijavila u roku od 30 dana nakon otpuštanja iz ustanove za izvršenje kaznenih i prekršajnih sankcija
- na stručnom osposobljavanju ili prekvalifikaciji koje organizira zavod za zapošljavanje.
- se prijavila u roku od 30 dana po povratku iz inozemstva i ako su prije odlaska u inozemstvo bila zdravstveno osigurana
- se prijavila u roku od 90 dana nakon završetka školske godine u kojoj su završila redovna školovanja

Nerijetko se u praksi dešava da isti ostaju bez osiguranja ne svojom krivicom. Iz ovih razloga Partnerstvo za zdravlje i ICVA u saradnji sa Zdravstvenom mrežom u BiH pokreću Kampanju za izmjenu/dopunu zakona o zdravstvenom osiguranju kojom bi se ukinuli rokovi za prijavljivanje na Biroima za zapošljavanje.

Izmjenom Zakona ukidanjem te klauzule u njenom izmjenom smanjio bi se broj neosiguranih lica. Ovom kampanjom tražimo donošenje Zakona o izmjenama i dopunama Zakona o zdravstvenom osiguranju tačnije izmjene člana 19. tačke 12. 13a i 14 i član 86 tačka 7.

Pored toga što bi smanjili broj neosiguranih lica ovim izmjenama Zakona osigurava se primjena međunarodno priznatih prava i sloboda utvrđenih u međunarodnim standardima.



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice

Omladinska organizacija Svitac je u martu nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Koordinatorica jutarnjih radionica je pripremila plan aktivnosti na temu ljudsko tijelo, zdravlje i zdrava ishrana, meterološko vrijeme, svemir i maske. Svake srijede su slušali i vježbali razne dječije pjesmice namijenjene njihovom uzrastu kako bi na taj način vježbali ritmiku i polako usvajali tekst. Materijali koji su se koristili za realizaciju ovih radionica su voštane boje, flomasteri, drvene i vodene bojice, kolaž i krep papir, drvo, karton, plastika, perje i blokovi za crtanje. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugom i usvoje lijepo ponašanje. U martu je do 20 učesnika pohađalo jutarnje dnevne radionice.



Poslepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti. (uzrast 8+).

Ponedjeljom su radionice kreativnog izražavanja, utorkom engleski jezik, komunikacija, izgovor, te razne igre koje pospješuju učenje stranog jezika u grupi. Grupa je takođe i ovaj mjesec pored gramatičkih zadataka vježbala komunikaciju na engleskom jeziku na temu vrijeme i opisi ljudskih karakteristika te vježbala već naučene riječi. Srijeda je dan za muziku i pjevanje, učenje osnova na muzičkim instrumentima gitari i klaviru, uključujući teoriju muzike za početnike i čitanje nota. I ovaj mjesec je tema bila identifikacija muzičkih instrumenata u pjesmama. Svakog četvrtka starija grupa je podijeljena u dvije manje i učesnici imaju mogućnost da se okušaju u društvenim igrama i timskom radu, razvijajući osjećaj za poštovanje drugog, socijalizaciju i fer igru. Petkom su radionice njemačkog jezika kao i dan za pomaganje u izradi domaće zadaće.

Radionice se održavaju u Omladinskom centru Brčko distrikta. Koordinator radionica u martu je bila Milica Baćanov uz asistenciju lokalnih i Weltwaerts i EVS međunarodnih volontera Alexandra Likica iz Njemačke, Bonnie Sturgess iz Australije, Mahmuta Taha Bicera i Yunusa Seckina iz Turske te Eleonore Pearson i Bena Owensa iz Velike Britanije. Broj učesnika starije grupe je trenutno između 15 i 20 učesnika.

„Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-19:30 časova. Grupa trenutno radi na komunikaciji, obradi određenih tema, koje su prilagođene uzrastu učesnika, rade se vježbe slušanja, te pisanje i čitanje. Radionice komunikacije na njemačkom jeziku su namijenjene

za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. U martu je grupa radila na temu hrana u restoranu i obradi određenih tema koje su prilagođene uzrastu učesnika. Koordinator projekta je međunarodni volonter iz Njemačke Alexander Likic. Radionice je u martu pohađalo 10 učesnika (dvije grupe).

„I love English“ – radionice komunikacije na engleskom jeziku sa izvornim govornicima



Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku su namijenjene svima koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. U martu su učesnici radionica radili na temama: prijave za studiranje i kako ispravno napisati CV. Koordinator projekta je međunarodni volonter iz Velike Britanije Ben Owens. Radionice je u martu pohađalo 10 učesnika.

„Učimo Turski“ – radionice komunikacije na turskom jeziku sa izvornim govornicima

Radionice turskog jezika su počele u drugoj polovini januara i održavaju se utorkom u prostorijama Omladinskog centra Brčko distrikt od 18:00-19:00 časova. Radionice komunikacije na turskom jeziku su namijenjene za sve koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. Učesnici su do sada imali priliku da usvoje alfabet turskog jezika, lične zamjenice, fraze predstavljanja, te da započnu jednostavne dijaloge. Koordinator projekta su međunarodni volonteri iz Turske Yunus Seckin i Mahmut Taha Bicer. U martu je bilo prisutno do 10 učesnika.

„Love Art?“ – radionice kreativnog izražavanja za uzrast 16+

Radionice kreativnog izražavanja se održavaju svakog utorka u prostorijama Omladinskog centra Brčko distrikt od 19:00-20:30 časova. Ove radionice su namijenjene za sve koji vole umjetnost i istoriju umjetnosti, te crtanje, slikanje i druženje uz diskusiju. Učesnici su ovaj mjesec vježbali slikanje porterta grafitnom olovkom. Koordinator projekta je međunarodna volonterka iz Velike Britanije, Eleonore Pearson. Radionice je u martu pohađalo 5 učesnika.

„Freeletics“ – sportske radionice

Sportske radionice se održavaju utorkom i četvrtkom od 21:00-22:00 časova u prostorijama Omladinskog centra Brčko distrikt i namijenjene su mladim ljudima koji žele da poboljšaju motoriku, kondiciju i tjelesnu snagu, te da steknu nove vještine i poznanstva. Koordinator vježbi za kondiciju i motoriku je međunarodni volonter iz Njemačke Alexander Likic.



Radionice gitare

Učesnici radionice gitare su nastavili uvježbavati etide i kompozicije Rolanda Dyensa, Carla Domeniconija, Franciska Tarrrege, Fernanda Sora, kao i duete Francisa Kleynjansa i Johna Dowlanda. Novi polaznici su se nastavili upoznavati sa osnovama instrumenta.

Radionice sambe

S obzirom na nove članove (grupa je većinom radila na lakšim kompozicijama (Samba Reggae, Batucada i Funk) pri čemu su stalni polaznici upoznavali nove sa vještinama koje su stekli u prethodnom periodu.



Dan Maternjeg jezika



Omladinska organizacija Svitac je, na poziv Bošnjačke zajednice kulture Preporod Brčko distrikt BiH, učestvovala u tradicionalno organizovanoj svečanosti povodom obilježavanja Dana maternjeg jezika (21. februar).

U okviru svečanosti, koja je održana 25. februara u Domu kulture u Brčkom, međunarodni volonteri Omladinske organizacije Svitac, Bonnie Sturgess iz Australije i Ben Owens iz Velike Britanije, su svojim učešćem podržali ideju poruke o njegovanju raznolikosti i drugih kultura.

Bonnie Sturgess je čitala poemu „My love,, spisateljice Oodgeroo Noonuccal iz Australije, a Ben Owens je izabrao poeziju engleskog pjesnika John Keatsa i prevod pjesme na engleski jezik „Modra rijeka“ od Mak Dizdara.

Bonnie Sturgess je čitala poemu „My love,, spisateljice

21. mart – Međunarodni dan borbe protiv rasizma



Omladinska organizacija Svitac je i ove godine obilježila 21. mart, Međunarodni Dan borbe protiv rasizma. Aktivnosti su održane u Omladinskom centru Brčko distrikt, prilagođene grupama uzrasta 4-7, 8-15 godina i 16+.

Prva grupa uzrasta 4-7 godina je imala priliku upoznati se sa pričom za djecu „Ružno pače“ od Hans-Kristijana Andersena (Hans Christian Andersen). Nakon čitanja priče, pravili su male pačićice za veliki poster, te su naučili da ne osuđuju osobe na osnovu njihovog izgleda.

Druga grupa uzrasta 8-15 i večernja grupa 16+ su pogledali prezentaciju o problemu rasizma u svijetu, te su imali priliku upoznati se sa radom raznih umjetnika i muzičara širom svijeta u borbi protiv rasizma. Obje grupe su takođe

napravile zajednički poster u vidu kolaža sa porukama mira.

Za april se planira nastavak svih redovnih radionica Omladinske organizacije Svitac.



H.O. MUSLIMANSKO DOBROTVORNO DRUŠTVO – MERHAMET DOBOJ

Ul. Kralja Aleksandra 17, 74000 Doboj
Tel./fax: +387 53 226 886
E-mail: merhamet.doboj@cutuk.net
FB: www.facebook.com/Merhamet-Doboj




Povodom dana nezavisnosti Bosne i Hercegovine - Preporod Doboj, u saradnji sa Islamskom zajednicom organizovao je druženje predstavnika političkih partija, NVO-a, vjerskih službenika i eminentnih uglednih građana Doboja, gdje je prisustvovala i predsjednica „Merhameta”

H.O "Merhamet" Doboj u partnerstvu sa međunarodnim forumom solidarnosti "EMMAUS" će podijeliti 70 hljebova dnevno tokom 41 dana, s tim da će se povećati broj korisnika. Naši članovi su izuzetno zadovoljni ovom aktivnošću.



22.3.2017. Održan je sastanak koalicije „TOLERANTNO I POZITIVNO IZ DOBOJA", sa predsjednikom skupštine i odbornicima, a na inicijativu OSCE-A iz Banja Luke. Tema je bila upoznavanje odbornika sa obimnim aktivnostima koje sprovodi koalicija, čiji je „Merhamet" Doboj veoma aktivna članica, koja je dobila priznanje za svoj rad.






Sajam nacionalnih manjina organizovan je u Doboju 25.3.2017., pod pokroviteljstvom OSCE-a Banja Luka i udruženja nacionalnih manjina Doboju čiji je predsjednik Dragan Marković.

H.O. „Merhamet“ Doboju je učestvovao na sajmu kao koalicija „Tolerantno i pozitivno iz Doboja“ sa svojim obimnim aktivnostima.

Na sajmu je učestvovalo 17 udruženja manjina i nekoliko udruženja NVO-a. Sa kulturno umjetničkim društvima, mažoretkinjama i nacionalnim jelima.

25.3.2017 Održan je okrugli sto na temu ljudskih prava manjina, gdje su aktivisti "Merhameta" prisustvovali. Predstavnici OSCE-a Brankica Tešanović i Siniša Petrović su uvodničari o ljudskim pravima manjina. Igor Ličina, predstavnik ministarstva za ljudska prava veoma iscrpno je prezentovao temu o ljudskim pravima manjina. Prikazana je i veoma interesantna prezentacija iz Prnjavora o rješavanju stambenih pitanja Roma.





Anesa Hidić, član Omladinske mreže, pojedinac

Omladinski krug Kladanj
E-mail: anesahidic@hotmail.com

Maskenbal proljeću i sreći

Učenici Osnovne škole "Kladanj" od prvog do šestog razreda, zajedno sa svojim učiteljima i nastavnicima organizovali su prigodan program pod simboličnim nazivom "Maskenbal proljeću i sreći".



Vožnja za domovinu



Biciklistički klub obilježio je dan nezavisnosti jedine nam domovine Bosne i Hercegovine! Lagana vožnja do prepoznatljive Djevojačke pećine, kratak predah i nazad. Sve je proteklo bez većih napora, povreda i u sportskom, drugarskom duhu.

Amina Mašić ušla u drugi krug najaktivnijih srednjoškolaca u BiH

U moru prijava koje su stigle, vrijedno rukovodstvo mrežSVUBiH-a je uspjelo izabrati 20 najboljih, među kojima je i naša sugrađanka Amina Mašić.



Centar za edukaciju, informisanje i afirmaciju mladih "INPUT"

Ul. Mokušnice 10, 72000 Zenica

Tel./fax: +387 61 766 532

E-mail: info@inputcentar.com

Web: www.inputcentar.com

Facebook: <https://www.facebook.com/udruzenje.input>

Aktivnosti Inputa u martu

U našem centru za mlade Input, Mart je mjesec sa puno aktivnosti i puno lijepih događaja. Pravo proljeće za Input, kako se u proljeće sve budi, tako su i volonteri u Inputu bili jako aktivni, a mladi zainteresirani za sve naše radionice. Ono što mlade posebno privlači kod nas je to što im pružamo razne radionice na kojima mogu dosta toga naučiti i mogu upoznati i porazgovarati sa uspješnim ljudima i kući poći sa jednim bogatim iskustvom i korisnim znanjem. Isto tako, volonteri u Inputu se uvijek potrude da se mladi osjećaju prijatno, ali i gosti s kojima se družimo i svoju pozitivnu energiju uvijek podijele sa svima. U nastavku ćemo vam priložiti neke od aktivnosti koje su trenutno aktivne u Inputu.

Članovi i članice INPUT-a su 1. Marta na prigodan način obilježili Dan nezavisnosti BiH sa djecom i mladima iz JU "Dom-porodica" Zenica. INPUT-ovci su organizovali nagradni konkurs za najbolji literarni i likovni rad.



6. marta u Inputu održana pasoš kompetencija za mlade

6. Marta u centru za mlade Input održana je Pasoš kompetencija za mlade u Centar za mlade INPUT.



INPUT-ovci obradovali štićenice u Domu za stara lica povodom 8. marta.




Čavrljanje sa Salihom Čabro - Arnautović je prošlo u prelijepoj atmosferi, gdje su mladi imali priliku da - baš uz čavrljanje, mnogo toga nauče od ambiciozne, MA ekonomije, Salihe Čabro – Arnautović. 15. Marta je također raspisan i konkurs Engleskog jezika u Input centru. Mladima se pruža prilika da kroz dijalog nauče pričati Engleski jezik, za samo par mjeseci. Na isti dan, grupa mladih djevojaka je održala prvu radionicu pod nazivom IT girls.



Gostovanje na TVZE povodom devet godina postojanja i rada Centra za mlade INPUT



20. Marta je objavljen konkurs Njemačkog jezika, a kurs Engleskog jezika je počeo sa radom. 23. Marta je održana radionica pod nazivom „Od ideje do brenda“, koju je vodila diplomirana ekonomistica Zerina Muco, marketing menadžer u kompaniji Vispak. Također, 23. Marta je održana druga radionica pod nazivom IT girls.



Aktivne članice INPUT – a su ovog mjeseca učestvovala u Move On Seminaru II, u organizaciji SHL – a, sa idejom koja nosi naziv „Cool zona“.



SAOPŠTENJA / INFORMACIJE / DONATORI / POZIVI

Banja Luka za zapošljavanje mladih daje 10.000 KM po projektu

Grad Banjaluka raspisao je javni poziv za prijavu projekata omladinskih organizacija i organizacija za mlade, koji će se sufinansirati iz gradskog budžeta u iznosu do 10.000 KM po projektu.

Rok za prijave je do 18. aprila, a uslov je i da projekat bude iz oblasti zapošljavanja mladih, neformalnog obrazovanja, kulture, te zdravlja i socijalne politike prema mladima, saopšteno je iz banjalučke Gradske uprave.

Projekat bi trebalo da bude iz oblasti informisanja mladih, ravnopravnosti polova, mobilnosti, omladinskog rada i organizovanja, zatim korištenja slobodnog vremena mladih i participacije u društvu, te oblasti borbe protiv nasilja i kriminaliteta, zaštite životne sredine, kao i stambene politike.

Prema pravilniku o sufinansiranju, podnosilac može da prijavi više od jednog projekta, uz posebne prijave i dokumentacije, ali, ukoliko u procesu vrednovanja više od jednog projekta dobije prolazne ocijene, finansiraće se samo jedan, i to onaj koji ostvari najveći broj bodova.

Pravo učešća na javnom pozivu imaju sve organizacije registrovane u skladu sa Zakonom o omladinskom organizovanju, odnosno koje su upisane u Omladinski registar Grada Banjaluka, te djeluju i imaju sjedište na području ovog grada.

Komisija za odabir projekata omladinskih organizacija, koju imenuje gradonačelnik, razmatraće i vrednovati pristigle prijave.

Prijava projekta na javni poziv, sa svom potrebnom dokumentacijom, podnosi se u dva primjerka u zatvorenoj koverti lično u Gradsku upravu ili preporučenom poštom na adresu Grad Banjaluka, Gradska uprava, Odjeljenje za obrazovanje, zdravstvo, omladinu i sport, Trg srpskih vladara 1.

Kompletan javni poziv, obrasce i Pravilnik preuzmite na sledećim linkovima:

[Javni poziv](#)

[Prijavni obrazac – obrazac 1](#)

[Prijedlog projekta – obrazac 2 sa priložima](#)

[Pravilnik o sufinansiranju](#)

Izvor: <http://www.atvbl.com/banjaluka-za-zaposljavanje-mladih-daje-10-000-km-po-projektu/>

Maypole Fund za podršku ženama koje rade na pitanjima izgradnje mira i nenasilja širom svijeta.

Maypole grantovi za žene

Opšti ciljevi:

Maypole Fund je neprofitna organizacija osnovana 1986. godine od strane žena uključenih u mirovne pokrete kao što je Greenham Common. Danas, mi smo grupa feministica koje dolaze iz različitih političkih sredina.

Ovaj grant je otvoren za sve žene širom svijeta sa ciljem da podrži one nenasilne aktivnosti koje su usmjerene na podsticanje mira i pravde, kao i održavanje sigurne životne sredine.

Koje aktivnosti se finansiraju:

Projektne aktivnosti koje će podržati ovaj fond moraju biti u skladu sa sljedećim ciljevima organizacije:

- mirovne inicijative, razoružanje i akcije protiv trgovine oružjem,
- anti-militarizam i aktivnosti usmjerene protiv nasilja muškaraca,
- teme vezane za nuklearna pitanja,
- pitanja okruženja i životne sredine,
- poboljšanje socijalne i političke nezavisnosti žena širom svijeta,

- internacionalna, nacionalna i regionalna mreža žena koja postoji u gore navedene svrhe.

Do sada je Maypole fond podržao najraznovrsnije aktivnosti – štampanje letaka, postavljanje izložbi i snimanje videa. Takođe su finansirali i pomogli ženama da kupovinom potrebne opreme osnaže svoje projekte, kao i da uzmu učešće na raznim konferencijama, radionicama i drugim događajima.

Veličina donacije:

Maypole pomaže donacijama do 750 funti.

Rok za prijave:

Za ovaj grant možete aplicirati **do 31. januara/siječnja i 30. juna/lipnja** svake godine.

Kriterij podobnosti:

Prednost će imati projekti koji nemaju mogućnost finansiranja od strane drugih donatora ili teško nalaze finansijere za svoje aktivnosti, jednokratni su ili oni koji nisu još počeli sa realizacijom.

Vaša aplikacija mora biti za projekat koji se nalazi unutar naših ciljeva i ispunjava jedan ili više naših kriterija. Koliko god bismo htjeli podržati sve ženske projekte, naša sredstva i statut to ne dopuštaju. U potrazi smo za maštovitim, nenasilnim i politički ekspresivnim projektima.

Molimo vas da pogledate <http://www.maypolefund.org/the-grant/> za više informacija.

Kako aplicirati:

Molimo vas da pogledate www.maypolefund.org/guides.html za više informacija.

Kontakt:

Web stranica: www.maypolefund.org

Oglas za obuku personalnih asistenata/ica

Udruženje Bosnian Doctors for Disabled raspisuje oglas za obuku personalnih asistenata/ica. Program obuke osposobljavanja personalnih asistenata/ica za osobe s motoričkim i senzornim invaliditetom obavlja se pod pokroviteljstvom Austrian Doctors for Disabled i Benecare fondacije.

Obuka obuhvata 48 sati i održavat će se vikendima u periodu od 27. maja do 11. juna 2017. godine.

Prvi ciklus 27. i 28. maja u Sarajevu,

Drugi ciklus 03.04. juni u Banjaluci i

Treći ciklus 10. i 11. juna u Sarajevu.

Troškove obuke, kao prevoza i smještaja snosi organizator.

Na program se mogu prijaviti osobe starije od 18 godina sa završenom srednjom školom i ljekarskim uvjerenjem o zdravstvenoj sposobnosti za obavljanje poslova personalnog/e asistenata/ice.

Nakon završene obuke vrši se praktična provjera znanja.

Polaznici obuke su nakon uspješnog završetka iste u mogućnosti samostalno obavljati posao personalnog/e asistenata/ice.

Kratko o programu:

Program obuhvata slijedeće oblasti:

1. Pristup društva prema pitanju osoba sa invaliditetom
2. Personalna asistencija osobama sa motoričkim i senzornim oštećenjem
3. Socijalna kompetencija

Prijave slati na: personalniasistenti.bdfd@gmail.com

Kontakt osoba: Azra Bradic

Kontakt tel: 00387 62 485 212

Prijavnica: [Prijavni formular TRENING PA.docx](#)

Više informacija: <https://www.facebook.com/bosniandoctorsfordisabled/>

Korisne informacije i linkovi za škole (Mreža izgradnje mira)

Drage/i,

Mnogo je otvorenih prilika za škole, nastavni kadar i učenike/ce, pa sada izdvajamo neka od objava koja sa web stranice Mreže za izgradnju mira. molba da ih pošaljete školama s akovima sarađujete te da ih pozovete da se priključe Mreži za izgradnju mira

Naša draga prijateljica i nadasve fantastična glumica Jasna Diklić je objavila poziv za Internacionalni festival srednjoškolskog teatra Juventafest 2017. Prijava je otvorena za sve pozorišne grupe čiji izvođači imaju između 14 i 19 godina. Link informacije <https://www.mreza-mira.net/vijesti/razno/prijava-juventafest-2017/>

Još samo par dana je otvoren poziv za razmjene osnovnih i srednjih škola sa Njemačkom, link <https://www.mreza-mira.net/vijesti/seminari-treninzi/program-omladinskih-razmjena/> Poziv će biti ponovo objavljen, ako vam bude trebala pomoć možemo vas povezati sa SHL-om.

Također je još samo par dana otvoren poziv OKC-a Banja Luka za dostavljanje likovnih radova i fotografija na temu "Želimo znati – kako u ovoj zemlji ostati"? Link objave je <https://www.mreza-mira.net/vijesti/takmicenja-nagrade/poziv-za-dostavljanje-likovnih-radova-fotografija/>

Tek je otvoreno 46. međunarodno takmičenje mladih u pisanju pisama za 2017. godinu. Link objave je <https://www.mreza-mira.net/vijesti/takmicenja-nagrade/takmicenje-mladih-u-pisanju-pisama/> Više informacija o takmičenju na engleskom jeziku je dostupno na linku <https://www.mreza-mira.net/vijesti/takmicenja-nagrade/2017-international-letter-writing-competition-young-people/>

UNESCO je objavio konkurs za fotografiju na temu obrazovanja za održivi razvoj, globalno građanstvo i rodnu jednakost kroz aktivnosti unutar i izvan učionice. Prijava je za mlade osobe starije starije od 15 godina, više na linku <https://www.mreza-mira.net/vijesti/takmicenja-nagrade/konkurs-za-fotografiju/>

Još samo par dana je otvorena prijava za WISE nagradu za obrazovanje, sve na engleskom na linku <https://www.mreza-mira.net/vijesti/takmicenja-nagrade/wise-prize-education-2017/>

Dovoljno je vremena za prijavu u okviru poziva za nominacije za UNESCO-Hamdan nagradu za izuzetnu praksu i učinak u poboljšanju efikasnosti nastavnika 2017-2018. Link objave je <https://www.mreza-mira.net/vijesti/takmicenja-nagrade/unesco-hamdan-nagrada/>

Do sredine idućeg mjeseca je otvoren poziv Merkura, tri granta, najveći 10.000 KM, link <https://www.mreza-mira.net/vijesti/takmicenja-nagrade/poziv-za-projekat-u-zdravoj-skoli-zdrava-djeca/>

Poziv samo za škole u Kantonu Sarajevo, Udruženje "Biću ti prijatelj" traži najinkluzivnije ideje, link <https://www.mreza-mira.net/vijesti/takmicenja-nagrade/udruzenje-bicu-ti-prijatelj-nagradjuje-skole-u-ks/>

Međunarodno takmičenje u pisanju eseja za osnovne i srednje škole, sve na engleskom jeziku, link <https://www.mreza-mira.net/vijesti/takmicenja-nagrade/2017-international-essay-contest-young-people/>

Takmičenje u crtanju za djecu od 5 do 16 godina, na engleskom, link <https://www.mreza-mira.net/vijesti/takmicenja-nagrade/2017-art-contest/>

Državno takmičenje za srednje škole „MLADI EKO REPORTERI“, link <https://www.mreza-mira.net/vijesti/takmicenja-nagrade/takmicenje-za-srednje-skole-mladi-eko-reporteri/>

Takmičenje za fizičare, nastavnike/ce i učenike/ce u srednjim školama, na engleskom, link <https://www.mreza-mira.net/vijesti/takmicenja-nagrade/aapt-high-school-physics-photo-contest/>

Grant shema, mogu pokušati mladi iz srednjih škola, davali su grantove na našim područjima, link <https://www.mreza-mira.net/vijesti/pozivi-za-projekte/xminusy-call-proposals/>

Sjajna inicijativa Fondacije Mozaik, jedne od naših najboljih i najaktivnijih članica, topla preporuka mladima da se prijave, link <https://www.mreza-mira.net/vijesti/pozivi-za-projekte/trebas-nekoga-da-te-pogura/>

I zadnje takmičenje/grant shema je ono Raiffaisen banke, mogu se prijaviti i škole, link <https://www.mreza-mira.net/vijesti/pozivi-za-projekte/raiffeisen-banka-konkurs-za-dodjelu-sponzorstava-donacija/>

Molba da nam šaljete informacije o svojim aktivnostima, objavićemo ih na linku <https://www.mreza-mira.net/kategorija/vijesti/skole-u-izgradnji-mira-i-ljudskih-prava/>

I napokon, prijavite se za članstvo u Mreži za izgradnju mira, besplatno je, a možemo vas podržati u ovim prijavama, link <https://www.mreza-mira.net/vijesti/aktivnosti-mreze/poziv-skolama-mreza-mira/>

Srdačni mirovni pozdravi, Mreža za izgradnju mira

Osmi poziv UNESCO-a za podnošenje zahtjeva za finansiranje projekata sredstvima iz međunarodnog fonda za kulturnu raznolikost

UNESCO je raspisao osmi poziv za podnošenje zahtjeva za finansiranje projekata sredstvima iz Međunarodnog fonda za kulturnu raznolikost (IFCD).

Fond je formiran 2005. godine s ciljem investiranja u projekte zemalja u razvoju, koji vode ka strukturalnim promjenama kroz upoznavanje politike i strategija koje direktno utiču na stvaranje, proizvodnju, distribuciju i pristup raznolikosti kulturnih izraza.

Smjernice o upotrebi resursa IFCD-a možete vidjeti na sljedećem linku:

http://en.unesco.org/creativity/sites/creativity/files/guidelines_ifcd_en_0.pdf

Projekti koje podržava IFCD u skladu su sa Konvencijom o zaštiti i promociji raznolikosti kulturnih izraza iz 2005. godine i pokrivaju širok spektar aktivnosti, od izgradnje kapaciteta do analize i razvoja politika, podrške preduzetništvu i konsolidacije kulturnih industrija.

IFCD-ov vodič sa bilješkama ima za cilj da aplikantima pomogne da na što efikasniji način pripreme svoje prijedloge projekata. Smjernice i prijedloge za apliciranje možete naći na sljedećem linku :

http://en.unesco.org/creativity/sites/creativity/files/ifcd_annotate_d_guide_2017.pdf

Rok za podnošenje zahtjeva je 14. april 2017. godine. Sve prijave podnose se putem zvanične online platforme IFCD-a, te zahtjevi poslani mailom ili pismom neće biti uzeti u razmatranje.

Sve informacije o proceduri podnošenja zahtjeva i selekciji, možete pronaći na linku:

<http://en.unesco.org/creativity/ifcd/apply/selection-procedure>

Izvor: <http://www.unescobih.mcp.gov.ba/konkursi/?id=14827>



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

**Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orcuzla@bih.net.ba
hcatuzla@bih.net.ba**

*Mjesečni bilten uređuje
Omladinski resursni centar -
ORC Tuzla*

*WEB stranica Mreže:
www.omladina-bih.net*

*Mejling lista Mreže:
posta@omladina-bih.net*

*Webmaster:
emir.delalic@gmail.com*